

Pelajar baharu UMS diseru tumpu pada pelajaran

Oleh YAP SIONG HAN

sionghan_yap@yahoo.com

UB 05-09-2012 B3

PARA pelajar baharu Universiti Malaysia Sabah (UMS) diseru untuk memberikan perhatian yang lebih kepada pelajaran mereka.

Naib Canselor UMS, Prof Dr

Mohd Harun Abdullah berkata hanya kejayaan peribadi membawa kebahagiaan pada kedua ibu bapa setiap pelajar.

“Bercintalah dengan pelajaran, bertunanglah dengan mengulangkaji, berkahwinlah dengan peperiksaan dan berbulan madulah dengan kejayaan.

“Tiada yang lebih membahagiakan kedua ibu bapa selain melihat anda semua menerima ijazah di dalam dewan ini nanti. Di sinilah anda bermula dan di sini jugalah akhir kembara ilmu semua pelajar nanti,” katanya dalam satu amanat naib canselor kepada siswa siswi baharu dalam sesi suai kenal di sini pada malam Isnin lalu.

Harun berkata, para pelajar tidak akan berada di universiti itu tanpa pengorbanan besar daripada pelbagai pihak khususnya ibu bapa yang tidak pernah letih mendidik pelajar semua.

Menurutnya, tanpa usaha guru yang mendidik di peringkat sekolah menengah dan pihak kerajaan yang menyediakan peluang pendidikan, para pelajar tidak mungkin mampu bergelar mahasiswa.

“Kenali diri sendiri untuk menentukan matlamat akhir hidup sementara di dunia... jauhilah gejala-gejala negatif yang boleh menjadi faktor penyumbang kepada kegagalan dalam hidup.

“Orang yang paling berkuasa adalah orang yang dapat menguasai dirinya sendiri. Orang



HARUN (kanan) bersalam dengan salah seorang pelajar baharu.

yang tidak boleh dipimpin, dia juga tidak boleh menjadi pemimpin,” katanya.


Harun turut mengingatkan kepada semua pelajar baharu agar tidak menjadikan demonstrasi sebagai hak asasi untuk

membuat perhimpunan yang menghancurkan keharmonian negara.

“Usah terikut-ikut dengan hasutan orang lain yang mempunyai agenda peribadi, jika kejahatan dibalas kejahatan, maka

itu adalah dendam.

“Jika kebaikan dibalas kebaikan itu adalah perkara biasa... jika kebaikan dibalas kejahatan, itu adalah zalim... jika kejahatan dibalas kebaikan maka itu adalah mulia dan terpuji,” katanya.



HARUN ketika menyampaikan amanatnya.